

Անտառայ հանեալ բնակեցոյց յայլ տեղի :

Ի սմին ժամանակի թագաւորն Երուսաղէմի Ամաւրի զնաց 'ի Կոստանդինուպօլիս և դարձաւ բազում գանձիւք յերուսաղէմ . և յետ աւուրց ինչ ձեռն արկ նորոգել զեկեղեցին Բեթղէհէմի , որպէս ցուցանէ Լատինական արձանադրութիւնն 'ի վերայ հարաւային որմոյ միջնադասուն Յունաց , որ ունի օրինակ զայս :

ՆՈՐՈԳԵՅԱԻ ԵԿԵՂԵՅԻՆ ԲԵԹՂԵՀԷՄԻ ԵՒ ԳՈՅՆԶԳՈՅՆ ՄՈՒԶԱՅԻԳ ՅՕՐԻՆԵԱՒ ԶԱՐԴԱՐԵՅԱԻ ՅԱՒՈՒՐՄ ԿԱՅՍԵՐՈՒԹԵԱՆ ՅՈՒՆԱՅ ՄԱՆՈՒԷԼԻ ԵՒ ԼԱՏԻՆ ԹԱԳԱԻՈՐԻՆ ԵՐՈՒՍԱՂԷՄԻ ԱՄԱՒԵՐԱՅ , ԵՒ ՅԵՊԻՍԿՈՊՈՍՈՒԹԵԱՆ ԲԵԹՂԵՀԷՄԻ ՌՈՏՈՒՅՈՍԻ , ՅԱՄԻ ՏԵԱՌՆ 1170 Ի ԶԵՌՆ ՊԱՏԿԵՐԱՀԱՆ ԵՓՐԵՄ ԿՐՕՆԱԻՈՐԻ ԵՒ ՄԻԻՍԻՈՍ ԱՐՀԵՍՏԱԻՈՐԻ :

Ի սինաղարդ գաւթին 'ի վերայ հիւսիսային որմոյ՝ 'ի ներքոյ սլատուհանաց են յետագայ արձանադրութիւնք :

Առաջին ժողով գումարեալ յԱնկիւրեա 12 եպիսկոպոսաց (314) , յորում սահմանեցաւ ընդունիլ յեկեղեցի զուրացողսն 'ի ժամանակս հալածանաց՝ ապաշխարութեան կանոնաւ :

Երկրորդ ժողով գումարեալ յԱնտիօք Ասորոց 'ի 55 եպիսկոպոսաց , ընդդէմ Պօղոսի Սամոստացոյ :

Երրորդ ժողով գումարեալ 'ի Սարգիկէ 140 եպիսկոպոսաց (348) ընդդէմ Արիոսի և 'ի հաստատութիւն Աթուոց ուղղափառ հայրապետաց :

Չորրորդ ժողով 'ի Գանդերիա գումարեալ 15 եպիսկոպոսաց (319) ընդդէմ Եւստաքիոսի եպիսկոպոսի Սերաստացոյ , որ խօտէր զօրէնս ամուսնութեան :

Հինգերորդ ժողով գումարեալ 'ի Լաւթիկէ 25 եպիսկոպոսաց ընդդէմ Մանթանոսի ազանդոյն (320) :

Վեցերորդ ժողով գումարեալ 'ի Կարկեդոն 50 եպիսկոպոսաց ընդդէմ Նովատեանց , որք ուրանային զապաշխարութեան օրէնս . (254) :

Ի վերայ հարաւային որմոյ , յանդիման գրեւոցս :

Առաջին ժողով գումարեալ 'ի Նիկիա 318 եպիսկոպոսաց , ընդդէմ Արիոսի մոլորութեան (325) :